

## 01 從急診

卓美玲

咱人從出世到過往，加減仔有機會去病院走一逝。我讀小學進前，規年迴天從急診袂輸咧行灶跤。等我讀國中身體較勇，就無啥機會閣去急診「鬥無閒」矣。

頂工和同窗的做伙去擯野球，換我上場的時，bat-tah 擰好勢想講：「若無 hǒng-bú-láng，上無，嘛有安打。」結果球無擯著，我顛倒去予球擊甲昏去送急診。規个急診室袂輸菜市仔，人是插插插，有發燒的、有車禍相擰的，嘛有冤家相拍送來遮的，醫護人員逐个是無閒頤頤。

抽四管血，電光嘛翕好勢，醫生講等檢查的報告出來，若無啥物問題就會當轉去歇睏。橫直愛等，無，就先眯一下，目調拄瞞瞞就聽著有人咧大細聲。一个淋酒醉的查埔人嚷講：「底時才換我看啦？等規半晷是咧創啥？」這个人聲嗽耷閣大嚨喉空，急診室的盾蓋是強欲夯起來！上好笑的是

伊閣唱聲講：「我捌陳院長，啊若鄭議員和我是換帖的！」護理師和伊講道理，仙講嘛講袂伸掉，真正是歹年冬厚痾人。急診處理病人有分五級，第五級的有當時仔愛等一、兩點鐘久，這是誠四常的。有一个醫生無細膩喃一句：「哎！橫柴夯入灶，誠害！」這個無衛生閣無智識的酒控聽著隨掠狂，從對醫生面頭前欲擲欲拍，閣雄雄咬人的指頭仔。自我生目調發目眉，頭一改看著醫生予人按呢躡躡。諄！做醫生嘛誠危險，拄著這款代有影衰！好得佳哉，我無欲讀醫科，無，若搪著橫霸霸的就愛做肉砧。

## 02 無蟳仔的蟳丸

### 陳雅菁

擔頭的桌仔頂啥物都攏有，鯊魚煙、肉皮、菜頭、粉腸、大腸，逐項攏予人看著喙瀾涌涌津。嘉義人講是「滷熟肉」，北部人食的是「烏白切」，啊若阮臺南人慣勢講「煙腸熟肉」。

你若來臺南迤迤，行入去 sa-khá-lí-bah 內底，原本恬甯甯的巷仔內，有一搭誠鬧熱，彼箍 lè 仔攏是點心擔，阮規家伙仔上愛食的是彼擔煙腸熟肉。頭家手裡的菜刀佇砧頂面咧跳舞，綴咧跳的有時是菜頭、煙腸，有時是大腸、蝦繭。阮對細漢到今上煞心的是一種號做「蟳丸」的點心。伊猶未切進前是圓圓仔一塊若菜頭粿的形體，欲食的時，頭家會共伊切做四四角角，黃色的外皮，內底是白色的番薯粉漿摻紅色的蝦仔，閣有小可仔通光的馬薺，看著真藝術。外埠頭的人見若看著，誠少人叫會出伊的名，毋捌的占較大面。其實佇嘉義嘛看會著這項點心，遐號做「蟳粿」，講起來嘛真趣

味，無論蟳丸抑是蟳粿，內底竟然攏無蟳仔！

會記得頭一擺食蟳丸的時，我問阿爸：「是按怎我攏無食著蟳仔？」阿爸應講：「因為蟳丸內底無蟳仔啊。」「啥物？這恰太陽餅內底無日頭的意思毋就 siāng？」我目矚視甲足大圈的，斟酌相對桌仔頂彼砧蟳丸去，心內感覺足懷疑，是按怎毋是叫做蝦丸咧？

### 03 烏仔卵是真的

張寶明

頂禮拜日阮去逛夜市，一下到夜市仔就看著烘烏仔卵的擔仔，我歡喜甲，隨共阿母討欲買。毋過阿媽煞喝講：「彼毋通食！彼烏仔卵是假的。」阿母共擔仔相一下，隨解說講彼烏仔卵是真的，彼卵殼頂懸花花，頭家會一粒一粒敲落去烘。「阿母，你看！毋信，你問頭家。」阿母有淡薄仔激動，手指頭仔比對擔仔遐去。

頭家真好禮共阿媽解說甲真清楚，講彼烏仔卵是真的，名號做鵪鶉仔卵，是去共大盤商割來的。「阿桑，來，這兩粒卵予你共敲落去烘盤烘看覓。」頭家真勢做生理，用實際體驗的方法共人說服。阿媽一下歡喜到地，一人買一攞予阮食。伊是歡喜買，阮是食甲誠歡喜。

阿媽那食烘烏仔卵閣那講，講彼火鍋店的烏仔卵是假的，無，是按怎攏平大粒？卵仁閣攏佇中央？阮阿媽真正

問題足濟的，伊有咧斟酌，才會遐愛問東問西。阿母這聲擋袂牢矣，緊共手機仔提予我，叫我問「牛姑」大神，拍「火鍋、烏仔卵」這幾字去共問，查來予阿媽看。真正有影，市面所有的烏仔卵攏是鵪鶉仔場專門生卵的鵪鶉仔生的。阿媽影片看了講：「人猶是愛食一歲，學一歲，才袂像我按呢做鼓井水雞。」阮攏呵啉阿媽有接受新智識的腹腸。